



NEWSLETTER

OLIMPIJSKOG KOMITETA BiH

No.11 novembar/decembar 2021



Dragi sportisti i sportski radnici,
Dragi prijatelji,

Još jedna teška godina je iza nas, ali je krasi sjajni nastupi i rezultati naših sportistkinja i sportista. I Olimpijski komitet Bosne i Hercegovine dobiva priznanja za svoj dugogodišnji rad. Naš Predsjednik g. Marijan Kvesić odlikovan je EOK-ovom nagradom "Evropski olimpijski vijenac", za dugogodišnje zalaganje razvoja Olimpijskog komiteta Bosne i Hercegovine i bh. sporta.

U svečanom ambijentu multimedijalne sale održan je 11. Izbor sportiste godine u organizaciji Olimpijskog komiteta Bosne i Hercegovine. Iako 2020. godine nismo bili u mogućnosti održati manifestaciju kojom slavimo rezultate i uspjehe bh. sportista jer su mnoga takmičenja bila otkazana ili odgođena, ove godine smo slavili veliki uspjeh bh. tima na višesportskim takmičenjima, među kojima i planetarni sportski događaj Olimpijske igre "Tokyo 2020". Stoga je titulu najboljeg sportiste u 2021. godini ponio naš najbolje plasirani sportista na Olimpijskim igrama Nedžad Husić.

Ova godina je zaista bila ispunjena uspjesima naših sportista, što govori i činjenica da smo u Olimpijskom komitetu BiH ugostili našu najbolju plivačicu Lanu Pudar pet puta, a povod je njen meteorski uspon od gotovo nepoznate djevojčice iz bazena do svjetske bronzane medalje. Samo u 2021. godini je na Evropskom juniorskom prvenstvu osvojila 1. mjesto u disciplini 100 m delfin, te dva druga mjesta na 200m i 50m u istoj disciplini, potom 19. mjesto na svojim prvim Olimpijskim igrama u Tokiju, a na FINA Svjetskom kupu je osvojila 3. mjesto na 100m. Naposljetku, osvojivši bronzu u finalu Svjetskog seniorskog prvenstva u malim bazenima, proglašena je najboljom juniorskom plivačicom u Evropi u dvije discipline, na 100m i 200m delfin.

Da Bosna i Hercegovina ima sjajne sportiste i sportistkinje dovoljno je da pogledate njihove rezultate postignute u 2021. godini u vrlo otežanim uslovima COVID-19 pandemije, i bez dugogodišnjeg sistemskog ulaganja u sport. Olimpijski komitet Bosne i Hercegovine, kao nebudžetski korisnik to čini na sljedeći način: stipendiranje evidentnih i potencijalnih sportista za kvalifikaciona takmičenja i pripreme za Olimpijske igre, stipendiranje evidentnih takmičara za pripreme za višesportska međunarodna takmičenja u organizaciji EOK-a i MOK-a kroz kontinentalne grantove, projekti izgradnje sportskog sistema, projekti podrške timskim sportovima, tehnički kursevi za trenere, edukacija sportista u polju dualnih karijera, i neizostavna pomoć Stručne službe OK BiH u administriranju projektnih i informacionih procesa u sportskom sistemu BiH.

U nadi da će u 2022. godini bh. sport i njegov svjetski odjek biti prepoznat od svih relevantnih aktera, slaviti ćemo učešće bh. sportista na Zimskim olimpijskim igrama "Peking 2022", Zimskom evropskom olimpijskom festivalu mladih "Vuokatti 2022", Ljetnom evropskom olimpijskom festivalu mladih "Banska Bystrica 2022" i Mediteranskim igrama "Oran 2022".

Olimpijski komitet Bosne i Hercegovine svim bh. sportistima, trenerima, sportskim radnicima i sportskim entuzijastima želi Sretnu Novu godinu! Da vas prati dobro zdravlje i pregršt sportskih uspjeha i rezultata.

prof.dr. Izet Rađo, potpredsjednik OK BiH



2022



Olimpijski komitet Bosne i Hercegovine
želi vam Sretnu Novu godinu


prof. dr. Milanko Mučibabić
Potpredsjednik


Marijan Kvesić
Predsjednik


prof. dr. Izet Rađo
Potpredsjednik


dr. sci. Said Fazlagić
Generalni sekretar

Moja priča.

bh

AKTIVNOSTI OLIMPIJSKOG KOMITETA BIH

PREDSJEDNIK OK BIH MARIJAN KVESIĆ | DOBITNIK EOK-OVE NAGRADE



Predsjednik Olimpijskog komiteta Bosne i Hercegovine Marijan Kvesić dobitnik je prestižne nagrade “Evropski olimpijski vijenac” koju dodjeljuje Evropski olimpijski komitet (EOK). Dobitnika ove prestižne nagrade izabrao je Izvršni komitet EOK-a, a predsjednik Kvesić je predložen od strane Predsjedništva OK BiH i Izvršnog komiteta OK BiH.

Nagrada je dodijeljena za izvanredne zasluge u korist promocije sporta u svojoj zemlji, te doprinosu unapređenja saradnje između evropskih NOK-ova i predstavlja veliko priznanje aktuelnom Predsjedniku Olimpijskog komiteta BiH, ali i članovima Predsjedništva Olimpijskog komiteta BiH, Izvršnom komitetu Olimpijskog komiteta BiH, te cijeloj bh. olimpijskoj porodici. Ovu prestižnu nagradu, predsjedniku Kvesiću uručio je predsjednik EOK-a Spyros Capralos.

Predsjednik Kvesić je naveo da je ovo nagrada za njegovu predanost Olimpijskom pokretu 25 godina u kontinuitetu, ali i priznanje za mnoge projekte koje je Olimpijski komitet BiH uspješno realizovao sa ciljem promocije olimpijskih vrijednosti, prijateljstva, poštovanja i izvrsnosti gdje su sportisti uvijek bili na prvom mjestu.

Dodjela nagrade se održala tokom 41. seminara Evropskih olimpijskih komiteta u Šamorinu, Slovačka, 26. novembra 2021.godine.

Upućujemo iskrene čestitke našem Predsjedniku, i neka ova nagrada bude podstrek svima da koračamo zajedno brže, više i jače ka jedinstvenom cilju unaprijeđenja bh. sporta.

Video dodjele pogledajte [OVDJE](#).

IZBOR SPORTISTE GODINE 2021 U ORGANIZACIJI OK BIH



NEDŽAD HUSIĆ JE NAJBOLJI SPORTISTA U 2021. GODINI U ORGANIZACIJI OLIMPIJSKOG KOMITETA BIH

U svečanom ambijentu multimedijalne sale Olimpijskog komiteta BiH i uz direktan TV prenos na FACE TV 08.12.2021. godine održana je 10. po redu manifestacija "Izbor sportiste godine" u organizaciji Olimpijskog komiteta Bosne i Hercegovine.

Izbor sportiste 2021. godine organizovan je u prisustvu najjavnijih lica bosanskohercegovačkog sporta, ambasadora i visokog predstavnika u BiH, i mnogih drugih zvanica poštivajući restriktivne mjere na snazi.

Ovogodišnja manifestacija također slavi snagu i jedinstvo sporta, koji uprkos teškim uvjetima i mnogobrojnim preprekama demonstrira svoju neizostavnu ulogu u svim sferama ljudskog djelovanja.



Ispred Olimpijskog komiteta Bosne i Hercegovine prisutnima se obratio Predsjednik OK BiH, g. Marijan Kvesić koji je sublimirao dosadašnje događaje Olimpijskog komiteta. Za sportistu 2021. godine proglašen je naš trenutno najbolji Olimpijci – Nedžad Husić!

Nedžad Husić se zahvalio Olimpijskom komitetu Bosne i Hercegovine, na dodijeljenom priznanju uz riječi: "Velika je čast i zadovoljstvo biti proglašen najboljim sportistom u 2021. godini. To je san svakog sportiste, a posebno u ovoj godini koja je za sve sportiste bila teška godina. Hvala svima koji me podržavaju


na ovom plemenitom putu, a posebnu zahvalnost dugujem svojoj porodici i prijateljima. Hvala vam!“

Nedžad se također zahvalio i svom treneru i ocu Harisu Husiću, koji je ujedno i dobitnik nagrade za najuspješnijeg trenera 2021. godine.



Za najbolju sportistkinju u seniorskoj konkurenciji, i također za nagradu ambasadora sporta, izabrana je naša JJ - Jonquel Jones. „Mother of Dragons“ je zasigurno sve opčinila svojom neizmjernom snagom i privrženošću ne samo prema košarci, već i cijeloj košarkaškoj reprezentaciji BiH. U ime JJ, nagrade je primila legenda ženske bh. košarke, jedna-jedina Razija Mujanović.

U kategoriji juniora, naša „Orka“ Lana Pudar je izabrana za najbolju mladu sportistkinju, dok je najbolji mladi sportista u 2021. godini Marko Maksimović.



Podijum su krasila i druga velika imena bh. sporta, te je među najuspješnijim sportskim klubom nagradu dobio Atletski klub Sarajevo, a Ženska košarkaška reprezentacija je proglašena najuspješnijom reprezentacijom BiH.



Olimpijski komitet Bosne i Hercegovine ni ove godine nije izostao u dodijeljivanju Specijalnih nagrada, a dobitnici su:

Za promociju sporta i Olimpijskih vrijednosti
Dane Pepić - judo
Tarik Kurtanović - paraplivanje

Sportski radnik, za dugogodišnji doprinos u razvoju sporta
Kemal Hošo - dizanje tegova
August Orlović - taekwondo
Nikola Stanković - kajak-kanu
Zijad Sejdinović - judo

Promotori sporta Bosne i Hercegovine
Emir Vučijak - biciklizam

Sportista ili ekipa iz porodice neolimpijskih sportova
Adnan Alagić - prirodni bodibilding i fitness
Nedžmin Ambešković - strongman sport

Posebna nagrada za istaknuti sportski rezultat
Seniorska reprezentacija BiH u sjedećoj odbojci

Nagrada za podršku u radu OK BiH
Sponzori OK BiH (BH Telecom, Lutrija BiH, No1, GB3, Toyota)

Nagrada za medijsku promociju olimpijskih vrijednosti
Sportska redakcija portala Klix.ba

Za uspješan dugogodišnji trenerski rad
Franjo Džidić - nogomet
Nihad Velić - judo
Ružica Kokeza - judo

Ambasador sporta
Jonquel Jones - košarka

Čitav tekst i kompletnu listu nagrađenih možete pročitati [OVDJE](#).



OLIMPIJSKI KOMITET BOSNE I HERCEGOVINE PODRŽAO SPORTISTE ZA ZIMSKE OLIMPIJSKE IGRE PEKING 2022 I EYOF VUOKATTI 2022



Olimpijski komitet Bosne i Hercegovine nastavlja sa programom podrške sportista u zimskim sportovima koji do sada već premašuje iznos od 360.000 KM

Za predstojeće Zimske olimpijske igre, koje će se održati u Pekingu od 4. do 20. februara 2022. godine OK BiH je kroz fond Olimpijske solidarnosti obezbijedio podršku sportistima u ukupnom iznosu od 25.000 USD, koji će na prijedlog Skijaškog i Sankaškog saveza BiH biti dodijeljen evidentnim kandidatima ZOI Peking 2022 Kvalifikovani sportisti, koji će dobiti novčanu potporu za pripreme učešća na predstojećim Zimskim olimpijskim igrama su:

Elvedina Muzaferija, alpsko skijanje
Emir Lokmić, alpsko skijanje
Strahinja Erić, ski trčanje
Sanja Kusmuk, ski trčanje
Mirza Nikolajev, sankanje

Također, u sklopu istog programa OK BiH je novčano podržao i mlade sportiste za pripreme učešća na predstojećem Zimskom evropskom olimpijskom festivalu mladih EYOF Vuokatti 2022, sa ukupnim iznosom u visini od 4.000 USD. Ugovore za mlade sportiste su potpisali predstavnici Saveza klizačkih sportova BiH i Skijaškog i Sankaškog saveza BiH.

Za ZOI Peking 2022, Olimpijski komitet Bosne i Hercegovine kao nebudžetski korisnik obezbijedio je značajna novčana sredstva kroz projektne aktivnosti, kako bi se naši potencijalni i evidentni Olimpijci, ali i "mlade Olimpijske nade" adekvatno pripremili za svoje nastupe na najvećim smotrama zimskih sportova u svijetu, Evropi i dalje. Novčana podrška sportistima je obezbijedena u vidu mjesečnih stipendija, a koje su uključivale i sredstva za putovanja na kvalifikaciona takmičenja. Ukupno, OK BiH je stipendirao 9 sportista na 28 mjeseci, te uz dodatnu podršku od 25.000 USD izdvojio 360.000 KM. Pored ovih sredstava, dodijeljena su i novčana sredstva sportistima u vidu nagrade za odličan sportski rezultat, među kojima je Elvedina Muzaferija u iznosu od 7.000 KM.

OLIMPIJSKI KOMITET BIH NAGRADIO LANU PUDAR POVODOM OSVOJENE BRONZANE MEDALJE NA FINA SVJETSKOM PRVENSTVU

Predsjednik OK BiH Marijan Kvesić, te potpredsjednici OK BiH prof.dr Milanko Mučibabić i prof.dr Izet Rađo, primili su danas plivačicu Lanu Pudar i predstavnike Plivačkog saveza BiH u prostorijama Olimpijskog komiteta BiH.

Povod prijema je uručivanje nagrade petnaestogodišnjoj Lani Pudar u visini 7.000 KM za nedavno osvojenu bronzanu medalju na FINA Svjetskom prvenstvu održanom u Abu Dabiju.



Olimpijski komitet BiH koji nije budžetski korisnik, je među prvima prepoznao olimpijski potencijal u ovoj mladoj plivačici, te ju je u 2021. godini finansijski podržao na njenom putu ka ostvarenju vrhunskih rezultata sa ukupno 42.000 KM, što se nadamo da će se nastaviti i u 2022. godini.



Podsjećamo da je OK BiH u novembru mjesecu nagradio Lanu Pudar i za osvojenu bronzanu medalju na FINA Svjetskom kupu 2021 u visini od 3.000 KM.

„Rado posjećujem Olimpijski komitet Bosne i Hercegovine i želim da im se zahvalim što prepoznaju moje rezultate i uspjehe, i nadam se da ćemo se češće viđati i naredne godine. Sezona je bila burna sa mnogo dobrih isplivanih rezultata, i pripreme za narednu sezonu kreću vrlo brzo. Hvala Olimpijskom komitetu BiH na velikoj podršci i potrudit ću se da vas nastavljam uveseljavati“, izjavila je naša najbolja plivačica Lana Pudar.



41. SEMINAR EVROPSKIH OLIMPIJSKIH KOMITETA U ŠAMORINU, SLOVAČKA



Na 41. seminaru Evropskih olimpijskih komiteta, koji se održao u Šamorinu - Slovačka, 25. i 26. novembra 2021. godine, ispred Olimpijskog komiteta Bosne i Hercegovine učesnici su bili Predsjednik g. Marijan Kvesić i Potpredsjednici prof. dr Milanko Mučibabić i prof. dr Izet Rađo, Generalni sekretar OK BiH dr sci. Said Fazlagić i Aela Ajdinović, viši stručni saradnik za projekte i marketing.

Seminar koji je trajao dva dana obradio je

mnoštvo aktuelnih tema iz Olimpijskog pokreta i sporta, a među njima izdvajamo:

- Olimpijske igre Tokyo 2020
- Održivost u sportu
- ZOI Peking 2022
- Prevencija manipulacije takmičenjima
- Projekti finansirani sredstvima Evropske Unije
- Dodijela Piotr Nurowski nagrade
- Marketing i komunikacije
- Evropske olimpijske igre
- EYOF Vuokatti 2022
- EYOF Banska Bystrica 2022

PREDSJEDNIK SVJETSKE GIMNASTIČKE FEDERACIJE I ČLAN MOK-A MORINARI WATANABE POSJETIO OK BIH

Čelnici Olimpijskog komiteta Bosne i Hercegovine ugostili su Predsjednika Svjetske gimnastičke federacije i člana Međunarodnog olimpijskog komiteta gospodina Morinari Watanabe. Pored Predsjednika OK BiH g. Marijana Kvesića i potpredsjednika prof.dr Milanka Mučibabića te generalnog sekretara OK BiH dr.sci Saida



Fazlagića, dobrodošlicu u Sarajevo su poželili i pomoćnica Ministra za sport Ministarstva civilnih poslova BiH Anđa Kalem Perić, ministar Kantona Sarajevo Samir Avdić, ambasador Japana u BiH Makoto Ito, kao i predsjednik Gimnastičkog saveza BiH Adamir Raščić sa svojim saradnicima prof.dr Mersad Suljević, prof.dr Amir Muratović i Saša Kovačević.

Prisutni su imali priliku da se kroz prezentacije predstavnika Gimnastičkog saveza BiH upoznaju sa trenutnim stanjem gimnastičkog sporta u Bosni i Hercegovini, s posebnim akcentom na (ne)postojeću adekvatnu infrastrukturu i prostore u kojima BH gimnastičari treniraju, što je ujedno i bio povod za ovaj prijem.

Više možete pročitati [OVDJE](#).

DOC. DR DŽENAN JAHIĆ, UČESNIK MOK SVJETSKE KONFERENCIJE ZA PREVENCIJU POVREDA I BOLESTI U SPORTU



Predsjednik Zdravstvene komisije OK BiH, doc. dr Dženan Jahić, boravio je u Monte Karlu gdje prisustvuje Svjetskoj konferenciji za prevenciju povreda i bolesti u sportu, u organizaciji Međunarodnog olimpijskog komiteta.

“Program lekcija je zaista bogat. Privilegija je biti ovdje i razmjenjivati mišljenja i preporuke sa najboljima iz svojih oblasti, za cilj zdravlja i što boljeg takmičarskog performansa naših sportista,” izjavio je doc. dr Jahić.

Svjetska konferencija MOK-a o prevenciji ozljeda i bolesti u sportu je međunarodna konferencija za one koji su zainteresirani za kliničke aspekte sporta i medicine vježbanja. Na konferenciji učestvuju eminentni međunarodni autoriteti u prevenciji povreda i bolesti. Ova trodnevna konferencija je jedinstvena prilika susreta globalne zajednice medicine sporta i vježbanja.

Doc. dr Jahić je 2019. godine završio postdiplomski program Sportske medicine Međunarodnog olimpijskog komiteta.

ČLANSTVO OK BIH U KOMISIJAMA EOK-A

Olimpijski komitet Bosne i Hercegovine sa velikim zadovoljstvom upućuje iskrene čestitke dr sci. Saidu Fazlagiću, Generalnom sekretaru OK BiH, i Aeli Ajdinović, Višem stručnom saradniku za projekte i marketing na članstvu u Komisijama Evropskog olimpijskog komiteta.

Na 41. seminaru EOK-a, koji se održao u gradu Šamorin, Izvršni komitet EOK-a je donio odluku o članovima EOK-ovih komisija i radnih skupina za naredne 4 godine u razdoblju 2021 – 2025.

Generalni sekretar OK BiH, dr sci. Said Fazlagić je član EOK-ove Komisije za marketing, dok je Aela Ajdinović član Komisije za EU i Međunarodnu saradnju.

Predstavnici Olimpijskog komiteta BiH će zasigurno dati veliki doprinos u radu gore navedenih komisija, ali istovremeno zastupati interese OK BiH i njegovih članica u okvirima rada i djelovanja Evropskog olimpijskog komiteta.



PREDSTOJEĆA TAKMIČENJA I AKTUELNOSTI

LJETNE OLIMPIJSKE IGRE • LA 2028

IZMJENE NA PROGRAMU OLIMPIJSKIH IGARA “LOS ANGELES 2028”

Međunarodni olimpijski komitet je donio odluku kojom se tri sporta: skateboarding, sportsko penjanje i surfanje trajno uvode na program Olimpijskih igara.

Međutim, tri najstarija sporta na Olimpijskim igrama: boks, moderni pentatlon i dizanje tegova se od Olimpijskih igara “LA 2028” više ne nalaze na redovnom programu, te se umjesto njih trajno uvode skateboarding, sportsko penjanje i surfanje.

S druge strane, tri sporta koja neće biti na programu OI “LA 2028”, se već duži niz godina “bore” za opstanak. Moderni pentatlon, koji je uveden 1912. godine, i koji predstavlja jedan od omiljenih sportova osnivača Olimpijskog pokreta Pierra de Coubertin-a, je prošao kroz niz promjena sa ciljem da se adaptira zahtjevima modernog sporta.

Ali ipak, ovaj sport ima najmanju gledanost, te se procjenjuje da moderni pentatlon donosi najmanje komercijalne dobiti.

Izvršni komitet MOK-a je također upoznat sa nizom problema u upravljanju, etičkim pitanjima, finansijama i problemima sa dopingom u boksu i dizanju tegova. Ali naravno niko ne spori značaj ovih sportova, kao što je dizanje tegova koje je u programu Igara još od 1896. godine, ali moguće je da ovaj sport nećemo gledati ni na OI Pariz 2024.

Boks koji se prvi put našao na Olimpijskim igrama 1912. godine, je također okarakterisan nizom problema, te je Međunarodna boksačka asocijacija i dalje pod budnom pratnjom MOK-a.

Ali sva tri sporta imaju pravo da se vrate na program Olimpijskih igara LA 2028, ukoliko uspiju da ispune sve zahtjeve MOK-a, te i u zavisnosti od ostalih sportova. Ovaj prijedlog će se ratificirati na Zasedanju MOK-a koje će se održati uoči 2022 Zimskih Olimpijskih igara u Pekingu.

Izvorni tekst možete pročitati [OVDJE](#).



LJETNE OLIMPIJSKE IGRE • PARIS 2024

RIJEKA SEINE ĆE BITI CENTAR SVEČANOSTI OTVARANJA OLIMPIJSKIH IGARA "PARIS 2024"



Paris 2024 je objavio da će rijeka Seine biti centar Svečanosti otvaranja Olimpijskih igara. Organizatori kažu da će Seine biti "pista za sportiste", a delegacije će putovati na oko 170 čamaca niz rijeku. Ruta će početi od Pont d'Austerlitz, mosta koji se nalazi u blizini Francuske nacionalne biblioteke. Pont d'Iéna označava događaj rute, a most se nalazi pored Ajfelovog tornja.

Ova ceremonija otvaranja će obilježiti historiju Igara. Prvi put ikada, umjesto na stadionu, održat će se u srcu glavnog grada. Ceremonija će biti dostupna svima. Olimpijske i Paraolimpijske igre u Parizu 2024. označit će početak novog poglavlja u ovoj priči, s plivanjem u samoj Seni.

MOK ima puno povjerenje u kreativnost, fleksibilnost i osjećaj za inovaciju koje je od početka demonstrirao tim Paris 2024. Oni će osigurati da ceremonija otvaranja bude zaista jedinstveno i emotivno olimpijsko iskustvo za sportiste, koji će biti okruženi publikom, dočekani i proslavljeni od strane francuskog naroda.

Izvor: <https://www.insidethegames.biz/articles/1116787/paris-2024-opening-ceremony-plans>

ZIMSKIE OLIMPIJSKE IGRE • PEKING 2022

ZIMSKIE OLIMPIJSKE IGRE PEKING 2022 | BORILIŠTA

Zona Yanqing smještena je 75 kilometara sjeverozapadno od centra Pekinga. Yanqing je planinsko predgrađe kineske prijestolnice prepuno toplih izvora, nacionalnih parkova, skijališta i Badaling dijela Kineskog zida. Olimpijska mjesta u Yanqing-u organizirat će alpsko skijanje, kao i takmičenja u sankaskim sportovima: bob, sankanje i skelet.



Nacionalni sankaski centar u Yanqing-u je prva sankaska staza u Kini i tek treća u Aziji. Centar nudi kapacitet od 2.000 sjedećih mjesta, kao i još 8.000 stajaćih mjesta.

Nakon završetka Zimskih olimpijskih igara, centar će se koristiti za održavanje međunarodnih takmičenja, kao i mjesto za trening Kineske reprezentacije.

Nacionalni alpski skijaški centar smješten u planinskom području Xiaohaituo na sjeverozapadu Yanqinga. Sastoji se od sedam staza, s najvećim vertikalnim padom koji doseže 900 metara.

Sportsko borilište će se i dalje koristiti za međunarodna takmičenja i treninge sportista nakon Zimskih olimpijskih igara - ima kapacitet od 5.000 sjedećih mjesta i 3.500 stajaćih mjesta za gledaoce.

Izvor: <https://olympics.com/en/beijing-2022/venues>

ZIMSKI EYOF • VUOKATTI 2022

PLAMEN MIRA

Svečanost paljenja Plamena mira Zimskog Evropskog olimpijskog festivala mladih Vuokatti 2022 se održala 4. decembra 2021. godine u čuvenom muzeju Ara Pacis, u centru Rima.

Ovom svečanosti službeno je započeto odbrojavanje do početka glavnih EYOF 2022 događaja, a 13. decembra počeli su se održavati i hokejaški turniri za dečake.



FOTO: eyof.org

Specijalni gosti svečanosti su bili Predsjednik Evropskih olimpijskih komiteta Spyros Capralos, Silvia Salis, druga potpredsjednica CONI-a, Mika Kilpeläinen, gradonačelnik Sotkamo grada i Direktor Organizacijskog komiteta EYOF Vuokatti 2022, lidomaćin svečanosti Valentina Marchei, italijanska klizačica u umjetničkom klizanju.

Odbrojavamo do početka Zimskog EYOF-a Vuokatti 2022 – 20. marta 2022. godine!!!

AKTUELNOSTI IZ OLIMPIJSKOG POKRETA

OKVIR MEĐUNARODNOG OLIMPIJSKOG KOMITETA O PRAVEDNOSTI, INKLUZIJI I BORBI PROTIV DISKRIMINACIJE

Poslije dvogodišnjih konsultacija sa više od 250 sportista i interesnih grupa, a koje uključuju i Međunarodne saveze, MOK je objavio novi "Okvir o pravednosti, inkluziji i borbi protiv diskriminacije baziran na jednakosti spolova i rodnih varijacija", a koji je usvojen na Sjednici Izvršnog komiteta MOK-a ,12. novembra 2021. godine.

Ovaj Okvir predstavlja novi pristup zasnovan na principima, sa ciljem da pomogne Međunarodnim savezima i sportskim tijelima da odgovore na ovu kompleksnu temu i uspostave prihvatljive kriterije koji će možda biti obavezni i primjenjivi za njihov sport, disciplinu, ili događaj.

Više možete pročitati [OVDJE](#).



FOTO: © IOC / Greg Martin

NOVI OLIMPIJSKI SHOP DOSTUPAN ONLINE

Po prvi put, fanovi će imati pristup Olimpijski brendiranoj robi iz prošlih, sadašnjih i budućih Olimpijskih i Paraolimpijskih igara u jednoj sveobuhvatnoj online prodavnici. Olimpijski online shop je otvoren na datum obilježavanja 1000 dana do otvaranja Olimpijskih igara Pariz 2024.



Olympic Shop možete posjetiti [OVDJE](#).

FOTO: <https://shop2.olympics.com/en/>

NOVI ČLAN MOK-OVE KOMISIJE SPORTISTA JESSICA FOX, OLIMPIJSKI PRVAK U KANU-U



FOTO: insidethegames.biz

Jessica Fox, australijski šampion u kanu-u, koja je osvojila zlatnu medalju u prvom Kanu slalomu za žene na Olimpijskim igrama u Tokiju, pridružila se Komisiji sportista Međunarodnog olimpijskog komiteta i predstavljala još jedan glas sportista u Olimpijskom pokretu.


Predsjednik MOK-a, Thomas Bach je imenovao Fox za člana Komisije, u skladu sa MOK-ovim propisima, i kako bi osigurao balans između spolova, regija i sportova. U pogledu nastupajućih Olimpijskih igara u Brisbane-u 2032, njeno imenovanje će ojačati zastupanje sportista Oceanije i kanu sporta.

NOVI VODIČ UN-OVOG ODJELA ZA BORBU PROTIV DROGE I KRIMINALA

Novi Vodič UN-ovog odjela za borbu protiv droge i kriminala "Pravni pristup u borbi protiv manipulacije sportskim takmičenjima", koji ima za cilj da podrži vladin sektor u razvijanju legislature u ovom važnom segmentu.

Tačnije, novi resursi nude pravnim zastupnicima, tužiocima, donosiocima odluka i drugim službenicima, praktične pristupe, najbolje prakse i smjernice kako pojačati kredibilitet i transparentnost sporta u okviru njihovih nadležnosti. Vodič također nudi model kaznenih odredbi koje zakonodavci mogu koristiti kako bi uveli posebne kriminalne radnje u ovom polju.

Vodič možete pročitati [OVDJE](#).



SPORTSKI STRUKOVNI SAVEZI BIH

DŽUDO SAVEZ BIH

21. MEĐUNARODNI DŽUDO TURNIR BIH & NIPPON SARAJEVO 2021



Još jedno u nizu međunarodnih džudo takmičenja održano je u dvorani Hotela Hills na Ilidži.

Uz brojne zvanice, svečanom otvaranju prisustvovao je i potpredsjednik OK BiH, prof. dr Milanko Mučibabić koji je tokom takmičenja, dodijelio i medalje u jednoj od kategorija.

BIH & NIPPON je tradicionalni međunarodni turnir za djecu i kadete koji se organizuje uz podršku Ambasade Japana u Bosni i Hercegovini, s toga je na turniru prisutan bio i Ambasador Japana, NJ.E. Makoto Ito.

TAEKWONDO SAVEZ BOSNE I HERCEGOVINE EVROPSKO TAEKWONDO PRVENSTVO ZA JUNIORE



Evropsko prvenstvo u taekwondou za juniore održalo se od 12. do 15. novembra 2021. godine u Sarajevu.

Najbolji plasman ispred BH tima imala je Nadina Mehmedović koja je osvojila srebrnu medalju, dok je Ilija Jukić osvojio bronzanu medalju.

Nakon početnih borbi upriličeno je svečano otvaranje kojem su prisustvovala brojne zvanice iz Bosne i Hercegovine i Evropske Taekwondo Federacije.

Prisutnima su se obratili predsjednik organizacionog odbora i član predsjedništva Taekwondo saveza BiH Samir Šarić, Fred Buitenhuis ispred Evropske Taekwondo federacije i Ministar kulture i sporta Kantona Sarajevo Samir Avdić.

TAEKWONDO SAVEZ BOSNE I HERCEGOVINE **DRUGI MODUL EDUKACIJE NA PROJEKTU "RAZVOJ DRŽAVNE SPORTSKE** **STRUKTURE" TAEKWONDO SAVEZA BIH**

Drugi modul edukacije na projektu "Razvoj državne sportske strukture" Taekwondo saveza BiH održan je u Prijedoru, 12. decembra 2021. godine.

Svoja predavanja imali su Marijan Pilipović na temu "Trening snage", dr. Nenad Rađević na temu "Organizacija sportskog treninga", Emir Duranović na temu "Baza podataka TKD-x", te nacionalni koordinator projekta Dino Šečić na temu "Umjetnost i nauka treniranja".



Projekat se realizuje u saradnji sa Olimpijskim komitetom Bosne i Hercegovine, pod direktnom ingerencijom Međunarodnog Olimpijskog komiteta (IOC), vrijednom 35.000 američkih dolara. Projekat ima za cilj da razvije i ojača bazičnu taekwondo trenersku strukturu i cjelokupan savez implementacijom srednjeročnog i dugoročnog akcionog plana.

Prisutnim učesnicima obratili su se i predsjednik IO za WT, Igor Đukanović i član predsjedništva Taekwondo saveza BiH Samir Šarić.

STRELJAČKI SAVEZ BOSNE I HERCEGOVINE **STRELJAČKOM SAVEZU BOSNE I HERCEGOVINE URUČENA VRIJEDNA** **OPREMA ZA RAZVOJ STRELJAČKOG SPORTA U BOSNI I HERCEGOVINI**

Nakon uručenog priznanja za razvoj streljačkog sporta u Bosni i Hercegovini, na Generalnoj skupštini Evropske streljačke konfederacije (ESC) Međunarodna sportska streljačka federacija (ISSF) je dodijelila Streljačkom savezu vrijednu donaciju.



Donacija se sastoji od 10 zračnih pištolja Hammerli AP 20, 10 zračnih pušaka Walther LG 10 kao i 10 SUIS elektronskih meta.

Ova oprema je od velikog značaja za Streljački savez BiH, i poslužit će za dalji razvoj streljačkog sporta u našoj zemlji kako bi naši streljači imali jednake uvjete kao i ostali sportisti u svijetu, te da bi mogli dostojanstveno i sa dobrim rezultatima predstavljati našu zemlju na međunarodnim takmičenjima.

SAVEZ DIZAČA TEGOVA BOSNE I HERCEGOVINE KUP PRVAKA I REKORDERA I MEMORIJAL ANDRIJA MALEČ KAO I ZAVRŠNO KOLO EKIPNOG PRVENSTVA BIH

U subotu 27.11.2021. povodom Dana Državnosti BiH, u dvorani Crossfit Sarajevo na Stadionu Koševo, održana su takmičenja: Kup Prvaka i rekordera i memorijal Andrija Maleč kao i završno kolo ekipnog prvenstva BiH.

Uz niz oborenih rekorda BiH:

- Nejla Kalača, Bosna, jedan rekord izbačaj seniorke kat 45 kg (također i rekordi U15, U17, U20 i U23)
- Amina Mašić, IsANEH-ZB, tri rekorda (trzaj, izbačaj i biatlon) seniorke do 87 kg kat (također i rekordi U23 i studentkinje)
- Faris Durak, KDT Željezničar, rekord u izbačaju u kategoriji 61 kg, seniorsi (također rekordi U20, U23 i studenti), kao i
- Benjamin Druškić, KDT Bosna, rekord u izbačaju, kategorija 81 seniorsi.



Više možete pročitati na [web stranici Saveza dizača tegova BiH](#).

CHEERLEADING SAVEZ BOSNE I HERCEGOVINE CHEERLEADING PRIREDBE U ZAPADNOHERCEGOVAČKOJ ŽUPANIJI



U Ledincu, Grudama, Ljubuškom i Širokom Brijegu održane su cheerleading priredbe na kojima je nastupilo preko stotinu sportašica i sportaša iz Zapadne Hercegovine.

18. decembra održana je Božićna Cheerleading priredba Cheerleading kluba Ledinac u OŠ Ruđera Boškovića Ledinac, a istog dana navečer održana je priredba i u

sklopu Humanitarnog adventa u Grudama. 21. decembra održana je Cheerleading Večer Sportskog cheerleading kluba Ljubuški u Kulturnom centru u Ljubuškom, a 23.12. u Sportskom centru Borak održana je Božićna priredba Hrvatskog cheerleading kluba Široki.

Zajedničko svim priredbama je da su sportaši iz ovih mjesta gostovali jedni kod drugih, te da su priredbe privukle velik broj gledatelja što je pozitivno iznenadilo sve klubove. Cilj priredbi bila je promocija cheerleading sporta i druženje kakvo dolikuje u blagdansko vrijeme, a sudeći prema velikom broju gledatelja cilj je i ostvaren.

Cheerleading sport privlači sve više mladih u Bosni i Hercegovini, a zbog svoje atraktivnosti privlači i publiku koja uživa u akrobacijama koje izvode cheerleading sportaši.

BH • TEAM

PLIVANJE | LANA PUDAR NAJBOLJA JUNIORSKA PLIVAČICA U EVROPI




Lana Pudar je prema objavi portala Swimranking najbolja juniorska plivačica u Evropi u dvije discipline.

Iz Evropske plivačke federacije (LEN) i baze rezultata nacionalnih plivačkih saveza, Lana se našla na prvom mjestu na 100m i 200m delfin, te postala evropska juniorska rekorderka, a na 50m delfin se našla na drugom mjestu.

FINA Svjetski Seniorski kup u malim bazenima (25 m) se održao u Abu Dabiju od 16. do 21. decembra 2021. godine. Naša sjajna orka Lana Pudar je u finalu u disciplini 200m delfin sa vremenom 2:04.88 osvojila treće mjesto i postavila novi juniorski rekord Evrope.

U disciplini na 100m delfin osvojila je sedmo mjesto sa vremenom 56.51.



Seniorsko Evropsko prvenstvo u malim bazenima (25m) se održalo u Kazanu od 2. do 7. novembra 2021. godine. Nakon što je izborila finale u disciplini 200 i 100m delfin, Lana je zauzela sjajno 5. i 6. mjesto u gore navedenim disciplinama, te postigla historijski uspjeh za bh. plivanje!



KOŠARKA | ŽENSKA KOŠARKAŠKA REPREZENTACIJA BIH | KVALIFIKACIJE ZA EVROPSKO PRVENSTVO 2023



Ženska košarkaška reprezentacija BiH odigrala je prve dvije utakmice kvalifikacija za Eurobasket 2023 na najbolji mogući način i upisala dvije pobjede.

Fenomenalnom utakmicom u dvorani Mirza Delibašić naše košarkašice su pobedile prvu kvalifikacijsku utakmicu za Euro 2023 protiv Belgije (treće selekcije Evrope) rezultatom 87:81. Nakon reprezentacije Belgije naše Zmajice su u Skoplju pobijedile i reprezentaciju Sjeverne Makedonije rezultatom 80:64.

ALPSKO SKIJANJE | SJAJAN NASTUP ELVEDINE MUZAFERIJE

Naša najbolja skijašica Elvedina Muzaferija ostvarila je istorijski rezultat na Svjetskom kupu u Sankt Moritz-u zauzevši 18. poziciju u superveleslalom disciplini.

Muzaferija je utrku završila s vremenom 59.41, i zaostatkom 1,6 sekundi od prvoplasirane takmičarke, što joj je donijelo 13 bodova u Svjetskom kupu.



Muzaferija je zahvaljujući ovom rezultatu došla do 13 bodova, što su joj prvi bodovi u karijeri u superveleslalomu u Svjetskom kupu, što predstavlja i najbolji rezultat bh. skijanja u historiji.

SANKANJE | MIRZA NIKOLAJEV NA PUTU KA ZOI PEKING 2022



Na Kupu Nacija u Innsbruck-u, Austrija, Mirza je završio utrku na 19. mjestu, a prethodno je nastupio i na 2. utrci Svjetskog kupa ostvarivši 23. mjesto.

Bitno je naglasiti da se Mirza kvalifikovao na ZOI Peking 2022, ali je potrebno da učestvuje u još četiri utrke kako bi završio svoju sankaašku sezonu, i pripremio se za ZOI Peking 2022.

JUDO | TONI MILETIĆ 5. MJESTO JUDO EVROPSKO SENIORSKO PRVENSTVO U23

Na Evropskom seniorskom prvenstvu U23 koje se održalo od 05.11. do 06.11. u Budimpešti, naš judoka Toni Miletić je u kategoriji do 90 kilograma ostvario sjajno 5. mjesto i tako se našao među najboljim mladim seniorima Evrope.



TAEKWONDO | SJAJNI NASTUPI NADINE MEHMEDOVIĆ I ILIJE JUKIĆ NA EVROPSKOM PRVENSTVU U TAEKWONDO-U ZA JUNIORE

Na Evropskom prvenstvu u Taekwondo-u za juniore u Sarajevu, Nadina Mehmedović je imala tri pobjede, i jedan poraz u finalu, čime je osigurala srebrnu medalju, a u kategoriji 78kg Ilija Jukić je osvojio bronzanu medalju.



Mehmedović je slavila nad predstavnicama Kipra sa 15:1, Srbije sa 7:4, Turske sa 7:6 da bi u finalu imala vodstvo od 8:2 protiv predstavnice Rusije. Ipak, do kraja borbe poražena je sa 14:10 čime je osvojila srebrnu medalju.

Jukić je u kategoriji do 78 kilograma u prvom meču ostvario pobjedu nad predstavnikom Rusije rezultatom 22:16. U četvrtfinalu je u uzbudljivom meču bio bolji od predstavnika Grčke sa 15:14, da bi u polufinalu bio zaustavljen od strane predstavnika Turske prekidom u drugoj rundi.



KOŠARKA | KVALIFIKACIJE FIBA BASKETBALL WORLD CUP 2023



Naša muška košarkaška reprezentacija je u kvalifikacijama za Svjetsko prvenstvo 2023 izborila dvije sjajne pobjede protiv selekcije Češke rezultatom 97:90 i selekcije Bugarske rezultatom 85:75.

Reprezentacija Bosne i Hercegovine je u grupi F sa selekcijama Litvanije, Bugarske i Češke, a tri najbolja tima će se plasirati u narednu, grupnu fazu kvalifikacija.

Kvalifikacioni mečevi za Svjetsko prvenstvo se nastavljaju u februaru 2022. godine kada će naša reprezentacija imati dvomeč protiv selekcije Litvanije.

ODBOJKA | U LUXEBURGU IZVUČENE GRUPE ZA EVROPSKA TAKMIČENJA U ODBOJCI



Ženska seniorska reprezentacija je saznala protivnike u CEV Zlatnoj ligi za 2022. godinu. Naše odbojkašice nastupaju u CEV Zlatnoj ligi te se nalaze u grupi sa Bugarskom, Francuskom i Španijom.

Izdanje CEV Zlatne lige za 2022. godinu će se odigrati od 25. maja do 26. juna iduće godine dok će Final four biti odigran nakon završetka grupne faze u Ukrajini.

Muška seniorska reprezentacija Bosne i Hercegovine će svoj put ka trofeju CEV Srebrene lige započeti u grupnoj fazi gdje će

se sastati sa reprezentacijom Sjeverne Makedonije, Rumunije i Albanije.

Izdanje CEV Srebrene lige za muškarce 2022. godine će se igrati u periodu od 25. maja do 12. juna nakon čega slijedi Final four koji će izboriti prve dvije reprezentacije iz dvije grupe.



STRELJAŠTVO | MEĐUNARODNA TAKMIČENJA

U Beogradu, u periodu od 08. – 10. oktobra 2021. održano je takmičenje u streljaštvu „Ištvan Poljanac". Naš strelac Matej Rašić se izborio za finale i u konačnici postigao rezultat od 247,5 krugova i okitio se srebrnom medaljom.

U Smederevu, u periodu od 12-14 novembra 2021. održano je takmičenje WALTHER YOUTH CUP. U disciplini Mix zračni pištolj, naši takmičari Sofija Rakić i Ivan Slijepčević su osvojili prvo mjesto. U disciplini Mix zračna puška, naš strelac Matej Rašić je u paru sa Ruskinjom Olgom Averkin u ukupnom poretku zauzeo 2. mjesto.



JUDO | ADA AVDAGIĆ | ZIMSKI TAEKWONDO KAMP HANKUK 2021



U periodu od 25-30.12.2021. godine, takmičarka Taekwondo kluba Sarajevo i stipendista OK BiH Ada Avdagić, učestvovala je na prestižnom zimskom taekwondo kampu "Hankuk 2021" koji je održan u Madridu (Španija) i koji je okupio 300 učesnika iz 27 zemalja svijeta. Kamp je vodio jedan od najuspješnijih trenera današnjice Jesus Ramal sa svojim suradnicima.

Avdagić je boravila na kampu u pratnji matičnog trenera Kolja Ibrahima i pod pokroviteljstvom Olimpijskog komiteta BiH u sklopu granta MOK-a namjenjenog razvoju budućih olimpijaca.

BILIJAR | SANJIN PEHLIVANOVIĆ | EVROPSKI VICEPRVAK U BILIJARU



Sanjin Pehlivanović najbolji bosanskohercegovački igrač bilijara je evropski viceprvak.

Sanjin je u finalu Evropskog prvenstva u disciplini "devetka" izgubio od jednog od najboljih igrača svijeta i nekadašnjeg svjetskog prvaka Joshue Fillera sa rezultatom 9:8 i na taj način nastavio nizati sjajne uspjehe na međunarodnoj bilijarskoj sceni.

EU PROJEKTI

SASTANAK PARTNERA SPORT4RULES

U Rimu, Italija, 15. i 16. novembra 2021. godine održan je sastanak partnera u sklopu realizacije Erasmus + sport projekta Sport4Rules „Sharing positive values through the enhancement of the referee's role“. Iako u vrlo striktnim COVID-19 mjerama, koordinator projekta i domaćin sastanka Odbojkaška italijanska federacija (FIPAV), sazvao je sastanak partnera u Rimu, jer je bilo vrijeme da se partneri na projektu sastanu i zajedno diskutuju o završenim aktivnostima i priprema za predstojeće događaje. Među njima je učestvovao i Olimpijski komitet Bosne i Hercegovine, kao partnerska organizacija.



Podsjećamo da Sport4Rules projekat ima za cilj da promoviše pozitivne vrijednosti kroz poboljšanje sudijske uloge i vrijednovanje sudijskog statusa. Sudije su te koje kontrolišu igru i garantuju poštivanje pravila i sigurnosti sportista. Glavne teme projekta su borba protiv nasilja, rasizma, diskriminacije i nepoštivanja pravila u sportu.

Na samom sastanku prezentovao se prvi radni paket, te su predložene preporuke za organizaciju nacionalnih događaja sa multiplicirajućim efektom. Ovi događaji predviđaju samu prezentaciju završenih aktivnosti na projektu te i jednodnevnu radionicu sa nastavnicima sporta i tjelesnog odgoja i trenerima nacionalnih sportskih saveza.

Članovi projektnog tima OK BiH su zajedno sa ostalim partnerima na projektu, prošli kroz kratku obuku kako će se organizovati radionica, naravno uz dozvolu da se izvrše manje adaptacije kako bi sama radionica bila usklađena sa potrebama učesnika iz BiH. Radionice su planirane da se održe krajem januara 2022. godine, dok je Olimpijski komitet BiH sa zadovoljstvom prihvatio da također bude organizator partnerskog sastanka krajem februara 2022. godine.



Učesnici projekta su se sastali u Rimu, Italija, 15. i 16. novembra 2021. godine. Sastanak je bio uspjehom završen i svi partneri su se složili na predložene preporuke za organizaciju nacionalnih događaja sa multiplicirajućim efektom. Ovi događaji predviđaju samu prezentaciju završenih aktivnosti na projektu te i jednodnevnu radionicu sa nastavnicima sporta i tjelesnog odgoja i trenerima nacionalnih sportskih saveza.

Uskoro će Olimpijski komitet BiH objaviti poziv za učešće na Sport4Rules radionici, stoga pratite naše društvene mreže za više informacija.

Više o projektu možete pročitati [OVDJE.](#)

INTERVJU SA... **LANOM PUDAR**



OK BiH: Lana kako je biti najbolja juniorska plivačica Evrope na 100m i 200m delfin?

LANA PUDAR: Pa iskreno, ja o sebi ne razmišljam na takav način. Svakako da gode priznanja, pohvale i nagrade, ali sam potpuno svjesna da ukoliko ne bude radila i trenirala još jače nego li i do sada, da se stvari mogu vrlo brzo promijeniti.

OK BiH: Lana često imaš običaj da pitaš: „Da li se i sada moram zahvaljivati?“, a mi ćemo sada tebi da se zahvalimo na tvojoj posvećenosti i promociji bh. sporta. Kakav je osjećaj dobiti čestitke od drugih vrhunskih sportista poput Amela Tuke, Edina Džeke i dr.? Šta to tebi kao mladoj sportistkinji znači?

LP: Hvala Vam na lijepim riječima. Znači strašno puno. Kada mi je poslije isplivane A olimpijske norme čestitku uputio Jusuf Nurkić, prvo sam mislila da me neko zeza. Pa kada sam onda pročitala čestitke Amela Tuke, Edina Džeke, Larise Cerić i ostalih naših vrhunskih sportista, onda tek malo postanete svjesni da ste napravili nešto veliko.



OK BiH: *Naporno treniraš, sad ćeš imati malu pauzu prije početka sezone u 2022. godini. Kako provodiš svoje slobodno vrijeme i kako usklađuješ svoje školske obaveze sa velikim brojem takmičenja i treninga?*

LP: Daje lako, nije. Ali uz dobru organizaciju sve se može. Kada sam na pripremama nosim knjige sa sobom i učim. U stalnom kontaktu sam sa svojim prijateljima iz razreda i sa svojim profesorima. Tako da uz njihovu maksimalnu podršku i razumjevanje sve bude lakše. Bitno je napraviti dobru organizaciju, odnosno dobar plan, toga se pridržavati i onda se sve može stići.

OK BiH: *Tvoji vrhunski rezultati i uspjesi u plivanju su podstakli potrebu za izgradnjom Olimpijskog bazena u Mostaru. Šta želiš poručiti odgovornim nivoima vlasti povodom toga?*

LP: Da napokon naprave bazen! Ne samo meni, nego svim plivačima u mome gradu i svim građanima Mostara. To nije nikakav luksuz, nego stvarna potreba. Ja sam Mostarka, Orka je mostarski klub i ja želim da titule, medalje i priznanja donosim sa mostarskog bazena. Nešto se evo vidim pokrenulo, pa valjda nešto konkretno i bude od toga. Gradonačelnik je na dočeku poslije medalje u Abu Dhabiu obećao da će grad krenuti u izgradnju bazena, pa se nadam da će se to napokon i desiti.

OK BiH: *Lana kako ćeš provesti Novu godinu ?*

LP: Sa svojim prijateljicama u stanu. Iskreno da Vam kažem, potrebno mi je da što više vremena provedem kući, da budem sa svojom porodicom, sa svojim prijateljima i Nova godina mi je idealna prilika za to.



OLIMPIJSKI KOMITET BIH | NOVOGODIŠNJE VESELJE ZA NAJMLAĐE



Olimpijski komitet BiH kao društveno odgovorna organizacija svake godine organizuje humanitarnu akciju i na trenutak onima kojima je pomoć potrebna pokloni lijepe uspomene i sjećanja.



U sklopu novogodišnje humanitarne akcije Olimpijskog komiteta BiH čelnici Olimpijskog komiteta BiH i sportski radnici posjetili su ustanove „Marija - Naša Nada“ dom za djecu s poteškoćama u tjelesnom i/ili psihičkom razvoju u Širokom Brijegu, Zavod za mentalno invalidne osobe „Drin“ u Fojnici i Centar za socijalni rad Zvornik - Djeca sa smetnjama u razvoju. Ovom prilikom su prenijeli najljepše pozdrave i novogodišnje želje Izvršnog komiteta OK BiH, vrhunskih sportista BiH, sportskih saveza BiH i cijele Olimpijske porodice, te uručili 160 novogodišnjih paketića.

Kako u Širokom Brijegu, tako i u Fojnici i Zvorniku, druženje sa štićenicima navednih ustanova je bilo izuzetno lijepo. Dječiji osmijeh i pogled pun radosti, sreće i zahvalnosti je najveća nagrada i zadovoljstvo koje se može dobiti.





Čelnici Olimpijskog komiteta BiH predsjednik Marijan Kvesić i potpredsjednici prof.dr Milanko Mučibabić i prof.dr Izet Rađose zahvaljuju domaćinima, Mariu Karačiću upravitelju ustanove „Marija-Naša Nada“, Nikolini Čolak predsjednici Cheerleading saveza BiH, Adisu Ramiću direktoru Zavoda za mentalno invalidne osobe „Drin“ u Fojnici,

Tariku Kurtanoviću treneru plivačkog kluba „Spid“ sa osobama sa invaliditetom i poteškoćama, Vukašinu Nikoliću direktoru Centra za socijalni rad Zvornik i njegovim saradnicima Danetu Pepiću, Slađani Popović, Sari Milić i Nikoli Drobnojaku, na srdačnom dočeku i ugodnom druženju.



ZAVIRITE U DRUŠTVENE MREŽE OK BiH (klikom na sliku)



Pratite nas na društvenim mrežama:
(klikom na ikone)



©2021. Olimpijski komitet Bosne i Hercegovine. Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.

